

## Sjaelberg

Martien Tonnaer

Sjaelberg mien plekske ich höb dich zoa gaer  
Ich sloet dich noch stieeëds in mien erm  
Huer of zeen ich dae naam örges stoan  
Waer ich van bönne gans werm  
En staon ich den weer 'ns dao onger die buim  
Dao bie die witte kapel  
Begint mien hertje hieël hel te slaon  
Krieg ich opèns hoonderevel  
Want Sjaelberg mien plekske ich höb dich zoa gaer  
Ich sloet dich noch steeds in mien erm

Ich zeen alles vääor mich wie in eine druim  
Ich kos eeder plekske, en auch alle buim  
Eder sjuurke, eder hek, edere stroek eder hoes  
Es ich mien uig toe doon veul ich mich weer toes  
't is lang geleje mer ich weit 't nog good  
det ich in 't zandj dao te spele zoot

Weer raapde kestaanjele aan de waeg bie de Hoos  
Lei Maosse haw lekker huidvleis en woos  
Ich preuf nag van Lena en Tilke 't lekker  
Ich ruuk 't broad van Wullem de Bekker  
Ich zeen ze noch zitte, op 't stuupke vääor 't hoes  
Dao veulde Pieër, Mat en Harie zich toes

Op zomerse aovendje klasjeneerde ze lang  
Äover 't knippe van Leike Hansen of de Pusj zien behang  
Äover voetbalclub Sjaelberg die maakde ederein in  
En de Wilson haw appelsiene zonger pitte in  
Ederein kos ederein gewuuen bie de naam  
En es der get woor ging m'n der same taege aan

Pieër van de Hover tummerde d'rop los  
De Buuzeman maakde graafstein den woor m'n de klos  
De kuuper dae staokde ein verrèkdes gooj pan  
En Sjieër van de Böggem brach milk mit de kan  
Maan van Verstraote ging mit ziene wage op paad  
In de kefeekes op Sjaelberg werd menigein zaat

Weer kènjer speelde onger de buim bie de kapel  
Raakde os mit metske staeke soms in 't vel  
Voetballe, reipe of oere lang kölse  
Bie de kuteleberg in het graas get ligke te rölse  
In de kefeeke op Sjaelberg dao maakde m'n spas  
't rook nao 't struue van de hulzekas

Bie Sjliepe verkoch m'n sjölke en knuip  
't paerd vanne zuul haw bie de Paereboom de luip  
Anton van Minke trok väärbie mit paerd en ker  
De waeg nao Wienand Wienen leek onmaetelik ver  
Puuetje baje mit opa in de Middelsgraaf  
Knien mit kirmes en de kersmis det woor pas gaaf

't is lang geleje mer toch.....

Sjaelberg mien plekske ich höb dich zoa gaer  
Ich sloet dich noch stieëds in mien erm  
Huer of zeen ich dae naam örges stoan  
Waer ich van bönne gans werm  
En staon ich den weer 'ns dao onger die buim  
Dao bie die witte kapel  
Begint mien hertje hieël hel te slaon  
Krieg ich opèns hoonderevel  
Want Sjaelberg mien plekske ich höb dich zoa gaer  
Ich sjloet dich väärgood, väärgood in mien erm

*Martien Tonnaer*